

INUIT ATAQATIGIIT

INATSISARTUNI



20. august 2011

UKA 2011/

Inatsisartut Suleriaasianni § 37 naapertorlugu Naalakkersuisunut apeqqut imaattoq matumuuna saqqummiuppara:

1. **Nunaqarfiit isorliunerusullu soorliit, KNI-p isertitakinneruffigivai?**
2. **Suleriaatsit periaatsillu allangortinniarneqarnerini, KNI-p nunaqarfinnut isorliunerusunullu sullissinerata sulii naamaginartumik ingerlanneqarnissaa, qanoq qulakkearniarneqarpa?**
3. **KNI Pilersuisumi suleriaatsit periaatsillu allangortinneqarnissaat allannguiffigineqarnerat takorloorneqartarpa? Taama allannguiniarneq qaqugu pisussatut takorloorneqarpa?**
4. **Naleqqussaaneq maanna ingerlanneqartoq, sulisunik soraarsitsiortornissamik kinguneqassava?**
5. **Maanna KNI 100 milliunit sinnerlugit sinneqartooruteqarpoq. Nunaqarfiit isorliunerusullu eqqarsaatigalugit, sullissinissamik isumaqatigiissutissaq maanna, KNI-p aammalu Naalakkersuisut akornanni ingerlanneqartumi, nunaqarfiit isorliunerusullu pilersorneqarnerisa pitsannngorsarnissaannut aningaasatigut nukissaqalertoqarpa?**
6. **Taamaangipat aningaasat sinneqartoorutaasut sumut atorineqarnissaat eqqarsaatigineqarpa?**

(Inatsisartunut ilaasortaq Olga P. Berthelsen, Inuit Ataqatigiit)

Ulloq august-ip 18-ani tusagassiuutitigut saqqummerpoq, KNI siunniussaartoq, nunaqarfinni kaaviiartitakinneruffiusuni sullissineq ajornerulissasoq. Taamatut oqariartuuteqarneq toqqissisimanangilaq, nunaqarfinni isorliunerusunilu najugallit eqqarsaatigalugit. Ukiut arlalippassuit ukiut tamangajalluinnaasa, KNI-p sullissineranut tunngassuteqartunik naamagittaalliuteqartoqartuartaqpoq. Maanna KNI-p sinneqartoornera iluarisimaarnarpoq, nunaqarfinni isorliunerusunilu ajornartorsiutaasartut aaqqiivigineqarsinnaangornerinik kinguneqarsinnaammat. Angallanermut Naalakkersuisup, ersarissamik nalunaarutigisariaqarpaa siunissami, nunaqarfiit isorliunerusullu qanoq naatsorsuutigineqassanersut.

KNI-p siulersuisuini siulittaasoq oqarpoq, Pilersuisumi suleriaatsit periaatsillu, siunissami immaqa allangortinneqassasut. Ukiut kingulliit ingerlanerini sulisut annertuumik ikilissineqarsimapput. Taamatut ikilisaanerup kinguneraa, nunaqarfinni isorliunerusunilu suliffissaaleqisut amerliallassimanerat. Suliffeqarfimmi KNI-mi naleqqussaaneq, tamaangga killeqanngitsoq Siulersuisuni siulittaasumit aamma oqaatigineqarpoq.

§ 37 naapertorlugu apeqquummut (nr. 2011-135-mi) akissutigineqartumi, Ineqarnermut Attaveqarnermut Angallannermullu Naalakkersuisup oqaatsigaa, nunaqarfinni isorliunerusunilu KNI-p kiffartuussinerup qaffasissusaa eqqarsaatigalugu, kiffartuunneqarnissamik isumaqatigiisummi aalajangersarneqarsimasut naapertorlugit naammassinnissinnaasoq.

Taamatut KNI-p allannguiniarnermik oqariartuuteqarnera eqqarsaatigalugu, sullissinerup appariartinneqannginnissaa Naalakkersuisut naammassiniartariaqaraat isumaqaratta taama apeqquteqaateqarpugut.